



12. august 2011

EM 2011/117

Inatsisartut suleriaasianni § 33 malillugu matumuuna aaliangiiffigisassatut siunnersuut imaattoq nassiunneqarpoq:

Inatsisartut aalajangiiffigisassaattut siunnersuut Naalakkersuisut pisussaatinneqassasut qallunaat naalakkersuisui atassuteqarfigissagaat, anguniarlugu USA-mi, Tysklandimi Ruslandimilu qallunaat allartitaqarfiinut atasunik Naalakkersuisut siniisussaannik atorfinitsitsisoqassasoq kalaallit soqutigsaannik ingerlatsisussanik, Namminersorluni Oqartussaannermut inatsimmi § 15 tunngavigalugu.

(Inatsisartuni ilaasortat Knud Kristiansen aamma Siverth K. Heilmann, Atassut)

Tunngavilersuut:

Aningaasatigut nalorninartorsiornerup erseqqissumik takuteqqippaa nunat nunastinnit tunisifiusartut taavigilluarnerisa pingaaruteqassusiat. Nunani allamiut kalaallit tunisassiaanik pisiortortartut aallartitaqarfigissallugit miueqatiginninnissami pingarutilerujussuovoq, amma Nunatta aningaasaqarniarnera eqqarsaatigalugu. Isumaqarpugut USA niuerneq pillugu aamma kalallit ilinniagaqartut periarfissaqarnisaannut periarfissarissaartoq, taamaammat tassani aallartitaqalernissaq kissaatigaarput. Aamma isumaqarpugut Europamut aamma Kalallit Nunaannut pingaaruteqaleraluttuinnarluni inissikkiartortoq. Taassuma saniatigut Ruslandimut attaveqarluarneq pilersinneqarlunilu ingerlatiinnarneqassasoq, aamma nunani issuttuni pingaaruteqarnera pissutigalugu. Tyskland tassaavoq Danskit tunisassiaanik pisortornerpaaq, taamaammat isumaqarpugut pingaaruteqartoq kalaallit tyskillu suleqatigiinnissaata pilersinneqarnissaa.

Kalaallit suliffeqarfiutaasa nittarsaanniernerinut kalaallit aallartitaqarfii pingaarutilerujussuanngorsinnaapput, USA-mut, Ruslandimut aamma Tysklandimut attaveqarluualernermut periarfissanik pitsaanngortitsinnaallutik. Kalaallit aallartitaasa kalaallit suliffeqarfiutaat ilisarineqarnerulernissaannut suliniarsinnaapput, suliffeqarfiit ersarinnerusunngorlugit nunarsuarmioqatigiillu unammilleqatigiinneranni pitsaanerusumik inississinnaangortillugit.

USA-mi, Ruslandimi Tysklandimilu aallartitaqarneq aamma kulturikkut sunniuteqarluarsinnaavoq. Nunani taakkunani kulturikkut takutitsisarnerit piareersartarnissaannut iluaqutaasalerumaartut neriuutigaaarput, soorlu eqqumiitsulianik takutitsinermi nipilersornerniluunniit Aallartitaqarfiit aamma suliarisinnaavaat USA-mi, Ruslandimi aamma Tysklandimi inuusuttortatta ilinniaqqinnissamut periarfissaasa ilikkarnissaannut.

USA-mi, Ruslandimi aamma Tysklandimi kalaallit aallartitaqalenissaat politikikkut, aningaasarsiornikkut kulturikkullu pingaaruteqassaaq. Naatsorsuutigaarput Bruxellesimi qallunaat aallartitaqarfianni kalaallit aallartitaqalesimanerattut periuseqarluni aallartitaqarfiliortoqassasoq, soorlu aamma Savalimmiormiut assersuutigalugu Londonimi aallartitaqartut, tassani qallunaat aallartitaqarfiata ilaatut.

Aningaasatigut allaffissornikkullu pisortanut kingunissai:

Naatsorsuutigaarput aningaasatigut allaffissornikkullu siunnersuut kinguneqassasoq. Namminersornermi inatsimmi § 15, 2 malillugu qallunaat aalajangersinnaapput Naalakkersuisut sinniisaat Naalakkersuisunit aningaasalersorneqassasut. Sanilliussinnaavarput Bruxellesimi aallartitaqarneq 2012-umi 4,1 millioner koruuninik ingerlatsinermut aningaasartuutaassasoq. Tamanna aamma USA-mi, Ruslandimi aamma Tysklandimi aallatitaqarfiit taamatut aningaasartuutaassasut naaastorsuutigineqarsinnaavoq. Kalaallit aallartitaqalernissaata aallartinnerani aningaasartuuteqangaatsiarnissaq naatsorsuutigisariaqarpoq, kisianni Danmarkimi Nunanut allanut ministeeriaqarfiup qanoq isumaqatigiiffiginissaa apeqquutaassaaq. Naatsorsuutigaarput aallartitaqarfinni pingasuusuni ataatsimik aallartitaqarfinni pisortaqaassasoq aamma allartitaqarfinni allatseqassasoq. Siunnersuut Namminersorlutik Oqartussanut ukiumut 12,3 millioner koruuninik aallaqqaammut aningaasartuutaanerulissaaq.

Aningaasatigut allaffissornikkullu namminersorlutik inuussutissarsiuteqartunut kingunissai:

Naatsorsuutigaarput Inatsisartut aalajangernerat kingusinersoq eqarsaatigalugu namminersorlutik inuussutissarsiuteqartunut iluaqutaalerumaartoq. Kisianni isumaqanngilagut namminersorlutik inuussutissarsiutilinnut aningaasatigut allaffissornikkullu allamik kinguneqarumaartoq.

Aningaasatigut allaffissornikkullu inunnut ataasiakkaanut kingunissai:

Naatsorsuutiginnilarput aningaasatigut allaffissornikkullu inunnut ataasiakkaanut kinguneqarumaartoq.